

Edicion Special **Himno y Bandera**

Asuncion Correa un Partera cu ta causa impresion cu su profesionalismo den parto :

PARTERANAN DI ANTAÑO Y AWE : PROFESIONALNAN EXCELENTE

Na ocasion di 18 di Maart celebracion **HIMNO Y BANDERA** den su edicion especial nos Seccion Columna di Finchi di DIARIO a invita Partera Asuncion Correa kende ta trece pa nos lectornan un topico hopi interesante y tambe al caso, pasobra nacemento di un baby ta un acontecimiento sublime. No solamente e lunanan di espera y preparacion, pero tambe tur loke e parto ta trece cune for di momento cu e noticia tanto espera ta resona : "Bo ta na estado". Manera antaño, den e caso aki un Partera a atende parto.

DRA. ASUNCION CORREA TA RELATA SU EXPERIENCIA COMO PARTERA :

"Pa cuminsa den corto mi tin cu bisa cu desde 1 di Maart 1970 mi tabata tra-



hando na Aruba como unico Partera. E tempo ey tur parto tabata na cas. Hospital tabata pa "Doctor" so.

Mi a keda traha te na 1980 haciendo parto na cas solamente, pero e periodo ey tabata dushi.

Tabata tin mihor contacto cu pacientenan. Despues, na 1980 mi a cuminsa traha cu S.V.B. tambe, y asina porta di Hospital a habri pa mi. E trabao den Hospital ta hopi facil, ya cu bo tin ayudo di

Verpleegster, siendo na cas ta ami mes ta haci tur cos pa mama y yiu.

Si mi tin di pasa e anochi na cas cu e señora cu dolor mi ta keda te cu ora e duna luz. Awor no.

Ta e Verpleegster nan ta pone bo na altura con cos ta bay cu e pacient, y si no tin nada special, cada 3 ora mi ta bay wak e pacient na Hospital. Tur e cooperacion aki ta hopi util y bon.

COMO GUIA DI MEDICO-STUDIANTE DI UNIVERSIDAD DI GRONINGEN

Di 1980 pa 1987 Dr. Oswald Wever a pidi mi guia e studiantenan di Universidad di Groningen, esta e mediconan estudiante. Esey, tambe tabata un periodo hopi agradable, pasobra mientras bo ta duna les bo tambe ta refresca bo memo-

ria door cu bo mester por duna practica y contesta nan preguntanan. Na 1990 mi tabata kier a traha menos y a dicidi di bay haci parto pa Dr. Alvarez-Quesada su pacientenan y de vez en cuando pacient di mi tambe. Algun ora pa siman mi tabata tene consulta tambe.

NA 1993 MI A DUNA LES NA MATER DEI LBO SCHOOL

Na 1993 Mater Dei LBO School a pidi pa yuda den dunamento di les na school den mi vak y mi a hacie te na 1998. Mi por a hacie, pasobra mi tin diploma di Leraren-Opleiding di IPA (Instituto Pedagogico Arubano) Hulanda a exige cu tur Partera cu ta duna les mester tin e diploma, dus cualifica pa duna les na co-assistent y Verpleegster.

Na 2003 mi a haya un contract cu AZV, pasobra sin contract tampoco bo por a traha cu AZV.

Dia 1 di Januari 2004 nos ta na Centro Medico na San Nicolas for di 8 'or te cu 10 'or di Diamars mainta. Pa segura mehor cuido di pacient sea ora mi ta cu vacacion of ora bo por ta malo.


Mi a dicidi di desde 2001 traha hunto cu otro Partera cu ainda tin mas aña trahando y ta trata aki di Partera R. L. de Windt cu un labor excelente di 41 aña. Nos ta na servicio di comunidad y nos tin nos consultorio na Apelsina-straat 39. Danki na DIARIO pa su invitacion y su espacio."

Sra. Correa ta casa cu sr. Leslie Merckies, e tin 2 yiu y 2 nieto : Mireille, Richenel, Armindah y Chris kendenan ta desea Pueblo di Aruba un celebracion feliz di "HIMNO Y BANDERA"

CLAUDIA TA RELATA SU PROME EXPERIENCIA DI PARTO CU PARTERA

Claudia Croes pacient di Partera Asuncion Correa a conta algo di su experiencia cu Partera Correa te na e ora di un parto feliz. Claudia ta feliz y contento. E ta splica

: "Bon, un feliz celebracion di "HIMNO Y BANDERA" na Pueblo di Aruba y mi tin cu bisa cu e parto cu un Partera den e caso aki Partera Asuncion Correa tabata uno sublime. Mi ta haya cu henter e proceso di parto a bay asina facil y lige, compara cu esun anterior di mi yiu muher Karol y mi no



sa si tabata, pasobra e tempo ey a trata di mi prome yiu cu casi semper ta tarda un poco. Pero, mi a sinti mi mes cu mas confianza durante mi di dos parto cu mi Partera Dr. Asuncion Correa. Mi no sa si ta, pasobra ta trata di un hende muher (cu tur respet pa e trabao profesional di Docternan), pero mi tabata sinti cu mas confianza. Loke mi a sinti tambe ta cu e Partera y su equipo cu ta asisti durante parto ta duna nan pacient hopi confianza. Na yegada na Hospital e Partera y e team na e sala di Parto ta ricibi bo cu asina atencion y cariño y practicamente mi a sinti mi mes na cas. Na ningun momento mi a sinti miedo y despues di e parto, normalmente tin hende no por lanta for di cama, algun sa haya raar di curpa y despues mas lat ami a lanta bay baño e mesun dia. E mesun mainta cu mi a drenta Hospital pa parto mi a sali mainta tempran bay compra algun cos, aunke for di anochi caba mi tabata sinti cu e baby ta na caminda, pero mi a keda keto y ora, cu mi a yama mi Partera, y el a tende cu mi ta den caya ta haci compras el a bisami pa mi bay inmediatamente Hospital y no pasa ni na cas mes y cu e tambe ta sali mesora pa Hospital.



Esy

Restaurant



SEROE BLANCO 42 / TEL: 5830862

Specializa den su platonan Criollo

Na tur nos clientela y na pueblo di Aruba en general,

Pabien riba e dia di Himno y Bandera.

**Y alavez nos kier a participa cu nos
ta habri mañan 18 di Maart
for di 11'or di mainta
brindando bo nos platonan netamente criollo
e.o. Pisca, Boonchi cu Rabo y Cabrito Stoba.**

**Pa pedido por yama nos
libremente na Tel.: 5830862**